

EUSKARA. Euskal Herri osoan euskarak ofizialtasun «erreal» izan behar duela aldarrikatu du EHE taldeak

EHE: «Biziberritze Planarekin joko politikoa egiten ari da Jaurilaritza»

Bere egin du
Oinarriak-ek hilaren
22an Iruñean deitu
duen manifestazioa

Gorane Agirre | BILBO

Eusko Jaurilaritza Euskara Biziberritzeko Planarekin «joko politikoa» egiten ari dela salatu zuen Euskal Herrian Euskaraz (EHE) taldeak, atzo. Adierazi zuenez, hainbat herritan «euskalgintzaren Plan Estrategikoei bizkarra eman eta dirua ukatzen diete, bere egitasmoa (Biziberritze Plana) inposatzeko».

Mariñe Kamiruaga, Mikel Irastorza eta Joxe Aldasoro EHEko kideek euskararen normalizazioa zertan den aztertu zuten hedabideen aurrean. Euskal Herrian euskara «zapaldua» dagoela, eta hizkuntza eskubideen «bortxaketa sistematikoa eta egiturazkoa» dela nabarmendu zuen Aldasorok.

Euskarak, azaldu zuenez, «Espainiako eta Frantziako legediak ditu soka modura lepoan korapilaturik; eta, unean uneko eta lekuan lekuko agintari politikoen arabera, sokeak gehiago edo gutxiago estutzen dute. Baina, estutze batek edo besteak, azkarrago edo mantxoago, arnasik gabe uzten gaitu».

Administrazioen jokabidea

Ildo horretan, legedi horien ondoren sortu diren administrazioak euskara «galbidera eramateko tresnarik eraginkorrena» direla azpimarratu zuen EHEko bozeramaileak, bi estatuen «menpe» egoteaz gain, «herria zatitzen eta euskara zapaltzen duten egiturak» direlako.

Azterketa orokorra egin ostean, euskararen egoera herrialdeka aipatu zuten. Araba, Gipuzkoa, eta Bizkaiari dago-kienez, Euskararen Legea onartu zenetik ia 20 urte pasa diren arren, «hizkuntza eskubideen ukazioa etengabea eta iraunkorra» dela gaitzetsi zuen Mikel



JOSU ETXEBARRIOSTE

Mariñe Kamiruaga, Mikel Irastorza eta Joxe Aldasoro EHEko kideak, atzoko agerraldian.

Irastorzak. Era berean, elebitasuna «ezinezkoa» dela nabarmendu zuen, «gizartearentzat hizkuntza batek, espainierak, hartzen baitu beti funtzio nagusia».

Bestalde, Eusko Jaurilaritza-ren jokabidea ere salatu zuen; batez ere, Euskara Biziberritzeko Planarekin egiten ari den «joko politikoa».

Irastorzak azaldu zuenez, «euskalgintza herrietan *Bai Euskarari Akordioa* zabalitzen ari den unean, Biziberritzeko Planaren herriratzea eta zabalpenari ekin dio Eusko Jaurilaritzak». Horren ondorioz, gainera, hainbat plan estrategikori

muzin egin, eta aurretik hitzartutako laguntzak ukatzea egotzi diote Jaurilaritzari: «Horretarako botere politikoak ematen dien babesaz baliatzen ari da».

Baieztape horren adibide gisa, Azpeitian gertatutakoa aipatu zuen: «Udalak euskalgintzarekin Plan Estrategikoa abiatzeko ituna sinatu zuen, eta orain horri bizkarra eman eta Biziberritzeko Plana ezarri du».


Nafarroan, bestalde, euskararen egoera oso larria dela azpimarratu zuen. Nafarroako Gobernuaren agintean den UPN eta PSN-PSOE «bidelaguna» hizkuntza politika «genozi- da» egiten ari direla salatu

zuen; hain zuzen, «euskaldunok eta euskara akabatzea helburu duena».

Azkenik, Iparraldean Frantziako Konstituzioak frantsesa ezarri eta euskara «ez existitzea» bilatzen duela adierazi zuen Irastorzak. «Hizkuntza eskubideak zanzaturik ditugu euskaldunok, eta euskararen iraupena larriki kolokan dago».

Euskararen egoera hori gainditzeko, Euskal Herri osoan «ofizialtasun erreala» izatea bide bakarra dela adierazi zuen Kamiruagak. Hori dela eta, Oinarriak hilaren 22an Iruñean egingo duen manifestazioarekin bat egin du EHEk.

ZIENTZIA. Donostia International Physics Center Fundazioa bisitatu zuen



JAVIER ETXEZARRETA / EFE

Ibarretxek ikerketaren aldeko apustua egin du

Juan Jose Ibarretxe EAEko lehendakariak eta Anjeles Iztueta Hezkuntza sailburuak Donostia International Physics Center Fundazioa bisitatu zuten, atzo, erakundeko zuzendari Pedro Miguel Etxenikeren gidaritzapean. Ibarretxek 2002ko au-

rrekontuetan zientziarentzat onartutako partidaren garrantzia nabarmendu zuen, iaz baino handiagoa delako. Ildo horretan, ikerketa eta garapenean inbertitzeko beharraz hitz egin zuen, «hortik etorriko baita gizartearen ongizatea».

UNIBERTSITATEA. Gaur bilduko da Klaustroa

Monterok bere kudeaketaren balantzea egin, eta asmoen berri emango du Klaustroan

Gorane Agirre | BILBO

Manu Montero EHUKo errektoreak 2000-2001 ikasturteko bere kudeaketaren balantzea egingo du gaur bilduko den klaustroaren aurrean. Era berean, ikasturte berrirako aurreikusita dauden egitasmo nagusien berri emango du.

Unibertsitateko batzorde gorenaren klaustroa Leioako Campusean bilduko da. Quorum nahikoa (klaustrokideen erdia) egonez gero, bilera 10:00etan hasiko da, eta beste-l, ordubete ondoren.

EHUKo Klaustroaren Funtzionamendurako Arautegiaren arabera, azaroaren 15a baino lehen egin behar zen bilera honetan, Monterok iazko ikasturtearen balantzea egin eta

klaustrokideek hartaz egiten dioten galderei erantzun beharko die.

Monteroren kudeaketa oso eztabaidatsua izan da; besteak beste, ekainean lau errektoreorde kargutik kendu zituen; beste errektoreorde batek eta idazkari nagusiak dimisioa aurkeztu zuten; eta zenbait fakultatetako dekanok eta zuzendari talde kritikoa eratu dute.

Beraz, ez dirudi Monterok oso erraza duenik bere kudeaketaren defentsa egitea. Edonola ere, azken egunotan errektorea —bere kabuz— unibertsitateko sektoreekin bildu da, babesa ez bada, kontrako jarrera sendorik har ez dezaten eskatzeko. Bileron emaitzak gaurko klaustroan ikusiko dira.